

新疆图志

新疆圖志

新疆圖志卷六十三

山脈五

北山

北山之首曰哈喇古顏之山其陽哈什河水出焉西南流入於伊犁河

西域圖志此山在額布圖達巴西北二百里晶郭勒南哈什郭勒發源南麓山脈自額布圖達巴折北而西爲天山分支至此孤峯聳豎

西域水道記哈什河發哈喇古顏山南麓準語古顏謂股也山腰以下石色深黑故名湧泉成池菹澤星布蕩而西流數里賽里克察罕烏蘇自北來匯乾隆二十二年定邊將軍成袞札布奏侍衛烏爾登於六月初九日追賊尼瑪等由博羅和羅山口

即博羅和洛山

往哈什河源一路山險雪融泥淖難行是其地矣沿哈什

河北岸皆伊犁圍場一水所匯爲一圍凡十圍以次而西賽里克察罕烏蘇之東卽第十圍也哈什河又西流六里布爾哈斯

台水自南來匯圖爾根察罕烏蘇自北來匯乾隆二十三年參

贊大臣巴祿奏言搜剿瑪哈沁至札木巴拉布拉克之源哈喇

沁參領賽圖於圖爾根察罕烏蘇勦賊四十餘人是也哈什河

又西流十里阿布達爾摩多水自北來匯又西流五里哲里摩

多水自北來匯又西流五里阿爾斯朗圖布董水

蒙古語阿爾斯朗獅子也布董謂物之巖大者言其

地之山巖大如獅之形

自北來匯又西流十五里哲庫布董水自北來匯哲庫

布董水西有無名水一亦南流匯哈什河哲庫布董水西十里

哈布齊克布董水南流匯哈什河又西十里烏里雅蘇台水南

流匯哈什河乾隆二十二年成袞札布奏言六月初九日明瑞

在額布圖

一作額

嶺口遇賊千餘擊之奪其寨追至額林哈畢爾

噶之烏里雅蘇台河賊人佔據山崖排列鎗礮在此水之側也

哈什河又西五里喀喇河南流匯喀什河喀喇河東有無名水

一其西有無名水四皆南流匯哈什河喀喇河西二十里巴爾

加圖水南流匯哈什河巴爾加圖水東有無名水二亦南流匯

哈什河諸水皆發自北山山無林木惟水道所行喬柯交蔭登
高遙矚若蒼龍十餘蜿蜒南走奔赴巨壑空山豐草自成周陸
每歲官兵行圍以習馳逐巴爾加圖南直特穆爾里克嶺嶺陰
之水北流來匯哈什河又西傍北山流二十里經齊齊爾哈納
托海營南隔岸爲呼賴特穆爾里克嶺嶺趨而北河流漸隘哈
什河經營西一里沙喇布拉克水自北來匯哈什河西流入峽
又流十里經胡吉爾台嶺南哈克布阻水自北來匯南北山勢
復開哈什河又西傍北山流十里呼濟爾吉爾瑪台水

蒙古語呼濟爾
嶺也言峰地而

水有
小魚

自北來匯又西傍北山流十里察察吉爾瑪台水自北來匯

哈什河又西傍北山流二十里稍折而南摩多圖吉爾瑪台水
自北來匯三吉爾瑪台水獨此有林木其山四面高阜中平曠
周十餘里將軍頓宿於茲水來自山東北隅峽中澄清無滓余
與領隊大臣布君彥泰策馬峽中溯流十里孱顏積黛蒙籠撥
雲幽討造深賞心斯契垂綸投餌白小盈筐水自峽出南流經

將軍營東自山東南隅峽出峽長里許怪石猱獐纍纍塞路激湍環曲琴筑齊鳴水達山外南流數里匯喀什河傍南山流其南曰烏圖嶺又西七十里經都爾伯勒津回莊南自甯遠城以東三百里皆回民田迄此莊而止乾隆二十年參贊大臣策楞奏言諾爾布林沁擊敗阿巴噶斯等欲整兵進勦而塔本集賽黨惡據險恐爲夾攻已移游牧於都爾伯勒津之地謂此也使準噶爾行程記云自空格斯河六十里至都爾伯勒津又一百二十里至策妄阿喇布坦游牧今自空格斯行者空格斯河岸十里至烏圖嶺越嶺西北行二十里渡喀什河河北岸渡口曰察罕拜牲自此西北行五十里至都爾伯勒津莊其西百二十里在蘇布台

蒙古語凡有穴者曰蘇布台

以東山勢平敞宜爲準部駐牧之所

謹案新疆圖說云喀什河源出博和拉亦名大蒙柯圖水博和拉西距甯遠城五百七十六里大蒙柯圖山西距甯遠城四百九十里西域圖志通謂之哈喇古顏山十二圍場山水

有曰哈喇果勒者卽哈喇古顏之轉音也今人通呼哈什河所出之山爲哈什山山脈自汗騰格里山東行五百里折而東北一百一十里至額布圖嶺由此東行爲天山正幹其西北一支由喀喇古顏山西北行折而東北卽伊塔諸山魏源北幹考所謂由伊犁博羅塔河之西遶額爾齊斯河宰桑泊之東北而起阿爾泰山者也

又西北曰呢勒哈之山呢勒哈水出焉南流入於哈什河

西域水道記此水發自呢勒哈山蒙古語謂幼孫曰呢勒哈也其山東西兩阜張股如箕水傍西阜之左南流達山外溉回民田瀦爲水磨經回莊匯於哈什河乾隆二十三年定邊將軍兆公惠奏言博羅布爾噶蘇嶺內呢勒哈有布古魯特之琿齊二百餘戶居住臣派瑚爾起率兵四百往至呢勒哈河遇遷移游牧圍殺四五十人琿齊等登山乞降卽此東西阜矣

謹案此山在木託圖水之西額林莫多水之東都爾伯勒津

回莊西北

又西北曰吉勒蘇胡之嶺額林莫多水逕其東入於哈什之河

西域水道記哈什河又西經吉勒蘇胡嶺南蒙古語吉勒蘇胡

謂日光晃眼也額林摩多水自嶺東來匯嶺南數里懸崖聳峭

危石倚空哈什洪濤衝齧其趾攀援如蟻臻其絕頂路轉山回

劣容馬足山中石璞往往鐫科木什木博第薩都佛呪綽克圖

贊丹經大旨言瞻拜如來三十五尊佛得解罪孽往生極樂又

有求福於松喀巴喇嘛華言達摩也發願之詞曰米克哲木皆蒙古書

或唐古忒書厄魯特人云昔準部時山水暴溢數致災害勒石

此山害遂止絕相傳是五百年物余與從者就馬上攜數石歸

番僧見之輒先頂禮哈什河又西流胡吉爾台水自北來匯又

西流三十餘里烏里雅蘇圖水自北來匯胡吉爾台迄於烏里

雅蘇圖連岡疊嶺土皆赤緹山巔崩圯溜痕宛然麓有碎石搏

結堅實正圓如甕各有嵌石石鑿番字與吉勒蘇胡嶺石相同

考驗厥狀蓋怒濤挾沙團積成阜禳災之說或不誣矣

又西北曰博羅布爾噶蘇之山有水焉西南流入於哈什河

西域圖志此山在哈喇古顏鄂拉西一百里入東谷口西行三十里爲覺羅托海又西南一百一十里爲額博爾濟達巴又西九十里爲塞特爾台哈喇海其地皆在山谷中又九十里出西谷口於是全山之形勢始盡乾隆二十二年六月將軍成袞札布遣副都統由屯等窮追逆賊呢瑪至額博爾濟達巴口擒之殲其衆二百餘獲馬駝牛羊七百餘所部乃平

西域水道記博羅布爾噶蘇水發自博羅布爾噶蘇山南流折而東經將軍營復西南流有泉發自營西復南流來匯其西南達谷外疏爲渠溉回民田復西南匯於哈什河哈什河北岸大山綿亙數百里以博羅布爾噶蘇爲門戶扎拉豐阿傳云乾隆二十年四月偵達瓦齊居察卜齊雅勒扎拉豐阿偕薩喇勒由博羅塔拉馳赴博羅布爾噶蘇奪隘口抵登努勒台沙喇扣肯

傳云阿睦爾撒納爲大軍所迫竄哈薩克巴圖爾烏巴什覬據伊犁轄四衛拉特聞我師有備竄察罕烏蘇博羅布爾噶蘇阿勒坦特卜什勒卜什沙爾海諸境是知爲伊犁東境要害矣

謹案準語博羅布爾噶蘇地多青柳也新疆圖說云博羅布爾噶蘇水源出登努勒台山伊犁鄉土志謂登努勒台與博羅布爾噶蘇山連界在府城東一百九十餘里故誤以博羅布爾噶蘇水爲出於登努勒台也乾隆二十七年伊犁辦事大臣阿公桂疏言前者臣等奏明今秋添設額林哈畢爾噶路軍臺自晶河博羅布爾噶蘇登努勒台一帶至伊犁安設適今年二月晶河運送籽種以登努勒台雪大難行訪之厄魯特乃由塔勒奇嶺賽喇木淖爾庫森木什克等處而來塔勒奇嶺山路較博羅布爾噶蘇嶺爲平正秋雪亦較登努勒台爲少惟水大之時略有未便而彼處有噶勒丹策凌時舊橋數處修其損壞可免病涉所有軍臺改由塔勒奇至托里

準語托里鏡也

六處安設從之據此則博羅布爾噶蘇山較塔勒奇爲尤險矣此山當哈什山盡處再西則滙合洛斯水南流合於

伊犁大河

又西北曰塔勒奇之山陰爲賽里木湖周一百里雪峰環之水色激沍阻籜噍羽不入於波夜有赤光上燭霄漢名曰淨海有神羊焉色青而大角見則雨雹其樹多林禽松樺楠柳多茶多藥草多禮鼠元獺有物焉狀如常鼠厥名曰鼪有鳥焉綠身而長尾與鼠同穴厥名曰餘其西庫色木蘇克一作庫森木西克之水出焉東北流注於布勒哈齊淖爾即哈喇塔拉額西柯淖爾其南塔勒齊之水出焉西南流注於伊犁河

其中多白魚鯊魚

西域圖志塔勒齊鄂拉在博羅布爾噶蘇鄂拉西北山形迤邐西南相屬庫色木蘇克郭勒發源西麓塔勒齊郭勒發源南麓其東谷口在察罕拜牲城西七十里托里西一百二十里南谷口距東谷口一百八十里由南谷口外一百里至伊犁郭勒北

岸之阿里瑪圖爲博羅塔拉之南山踰山而南卽喀什空格斯地乾隆二十八年秩於祀典每歲春秋致祭

西遊記重九日至回紇昌八刺城翌日並陰山而西約十程又度沙場其沙細遇風則流狀如驚濤乍聚乍散寸草不萌車陷馬滯一晝夜方出蓋白骨甸大沙分流也南際陰山之麓踰沙又五日宿陰山北詰朝南行長坂七八十里抵暮乃宿天甚寒且無水晨起西南行二十里忽有大池方圓幾二百里雪峯環之倒影池中師名之曰天池沿池正南下左右峯巒峭拔松樺陰森高踰百尺自顛及麓何啻萬株衆流入峽奔騰洶湧曲折彎環可六七十里二太子扈從西征始鑿石理道刊木爲四十八橋橋可並車薄暮宿峽中翌日方出入東西大川水草豐秀天氣似春稍有桑棗九月二十七日至阿里馬城鋪速滿國王暨蒙古塔刺忽只領諸部人來迎宿於西果園土人呼果爲阿里馬蓋多果實以是名其城其地出帛目曰禿鹿麻蓋俗所謂

種羊毛織成者時得七束爲禦寒衣其毛類中國柳花鮮潔細軟可爲綫爲繩爲帛爲綿農者亦決渠溉田土人惟以瓶取水載而歸及見中原汲器喜曰桃花石諸事皆巧桃花石謂漢人

也

程廷尉同文云品河城東至托多克積沙成山浮澀難行東距阜康縣一百里故云十餘程其間亂流而過常有洛克倫河呼圖壁河瑪納斯河烏蘭烏蘇河配不顯官塞外之雪山雪所融夏日盛漲過時則涸九月正水竭之時蓋不知有

河也自托多克過品河山行五百五十里至賽喇木淖爾東岸淖爾正圓周百餘里雪山環之所謂天池海並淖爾南行五十里入塔勒奇山峽諺云果子溝流水南流勢甚湍急架木橋以度車馬峽長六十里今爲四十二橋即四十八橋遺址出塔勒

奇山口南行百七十里至崑崙山乾隆二十八年建今日伊犁城阿里瑪城或即在阿里瑪河側阿里瑪河在拱宸城東北出塔勒奇山口至阿里瑪河僅百里漠然居士集有從容盡錄序末題曰甲申元日漆水移刺楚材督卿序於西域阿里

瑪城又西遊記記歸途云三月二十三日寅差阿狗僕於吹沒斃之南岸又十日至阿里瑪城西百餘里濟大河四月五日至阿里瑪城之東圓瑩日晚抵陰山前宿又明日復渡四十八橋綠溪上五十里至天池海東北過陰山後行二十二日方接元

歷金山南大河驛路徐松云其歸途渡那林河而直北由特默爾圖淖爾之西以達吹河之南乃轉而東北渡伊犁河其渡處在察林渡之東故百餘里即至阿里瑪城自阿里瑪城出塔勒奇山口經賽喇木淖爾與往時程同過賽喇木淖爾不復東

折而東北行其分路處在干珠罕卡倫地東北山行由沁達蘭至阿魯沁達蘭入塔爾巴哈台界以至原歷之金山大河驛

西使記過龍骨河復西北行與別失八里南北相直近五百里河西注瀦爲海約千餘里曰克色勒伯頁多魚可食有礪磧以水激之行漸西有城曰納袞又西南行過孛羅城所種皆麥稻山多柏不能株絡石而長城居肆圍間錯土屋牕戶皆琉璃城北有海鐵山風出往往吹行人墮海中西南行二十里有關曰

鐵木兒懺察守關皆漢民崎嶇似棧道出關至阿里麻里城

西遊錄過瀚海千餘里有不喇城

李光庭西域圖考云不喇城即西使記李羅城之轉音城南有陰山即松樹頭嶺山頂有池今養喇木泊在四山之

中即其地也

不喇南有陰山東西千里南北二百里

西遊記云初在沙陀北南望天際若銀霞間之左右皆未詳師曰多是陰

山盤日過沙陀過橋者再問之皆曰然李光庭曰自阿拉葵山之脈北繞西至伊犁北山東至阜康縣之博克達山皆曰陰山西遊記所云東西一千餘里南北二百餘里者也

山頂有池周圍七

八十里池南樹皆林檎樹陰蒼鬱不露日色

西域水道記此嶺爲伊犁北境門戶塔勒奇城者以山名之也

城在山南百里乾隆二十六年阿公桂所建新溝之西二十餘

里曰果子溝谷長七十里北有峻嶺扼之嶺上多松名曰松樹

頭嶺嶺東有泉曰察察布拉克西流至谷中有紅水泉發自松

樹頭嶺下來匯谷西山亦有水曰烏蘭烏蘇東南流來匯同南

流經鄂博勒齊爾軍台西軍台距松樹頭三十里有庫爾齊布

拉克水由東來匯又南流有烏博勒齊爾水由西來匯凡三十

五里經塔勒奇卡倫又南流三里有將軍布拉克水由東來匯

又南流二里經塔勒奇阿璜軍台東又南流里許遠谷外奔湍

迅急聲聞數里谷中跨水架橋四十有二峭壁夾道蒼松據崖
山鳥飛鳴林木陰翳入伊犁者驛程經此塞沙眯目頓覺清涼
迨乎初冬雨雪填谷行蹤斷絕又以是爲險隘也元長春邱眞
人西遊記云二太子扈從西征鑿石理道刊木爲四十八橋橋
可並車東西大川水草豐秀天氣似春稍有桑棗案今伊犁絕無桑樹蓋四十
八橋其來已舊今因其遺址爲四十二橋彼土不知遂謂前將
軍保文端公所創惜於訪古矣賽里木淖爾當惠遠城正北二
百里在松樹頭嶺下形南銳北豐南北百二三十里東西五六
十里又曰察罕賽喇木其水陽焊不耗陰霖不濫池中曾無片
草及其風擣鯢鱖子子皆所不生每日水潮若應子午嘗有閩
越流人善泅者欲探其淵入水數十武卽返言下有氣呼吸人
不得住竟無能測其深也松樹頭嶺東一里建靖海寺寺極壯
麗中祠龍神自寺東北行四十里至淖爾淖爾東南隅有三石
島相接近南者最大廣近百步冬月海冰島乃可陟東岸數百

步爲鄂勒著依圖博木軍台與干珠罕卡倫相去半里出入伊犁境者於此驗過余頓宿之暇步至海側沿波碎石不見纖草台兵言夜氣澄明天半懸一紅燈正臨海心疑爲神龍所宅矣傍淖爾東北隅有二小池居人謂之海耳海側多獺發其穴則中通數窟每窟土基如牀牝牡偶居乳雛積穀別有異穴兼有鼠能拱立所謂禮鼠也又有鳥鼠同穴者鼠如常鼠鳥長尾綠身如鵲而小黎明鳥先出翱翔鼠蹲穴口顧望漸走平地鳥來集鼠背張翼以噪鼠往返馳而鳥不墜良久乃已是即爾雅餘鼯郭景純言鳥鼠同穴山在隴西首陽縣以今驗之不僅渭源有此矣長春真人西遊記云晨起西南行約二十里忽有大池方圓幾二百里雪峯環之倒影池中真人名之天池於其歸也又云度四十八橋緣溪上五十里至天池海卽此淖爾也勝境鍾靈淪於荒塞佳名淹沒搜討無人嘉慶四年洪先輩亮吉成伊犁往返經此作淨海贊其序云未至三台有水焉廣濶可五

百步深至無底有島嶼無委輸不生一物不染一塵投以巨細
頃刻必漂流上岸土人稱爲西方淨海譯言賽喇木淖爾是也
余自烏魯木齊以來盥沐久廢又欲休馬力日步行半程足以
繭栗驟聆此名愧我塵垢爰稅駕路側餐白雪以洗心藉行潦
而盥手然後進焉則見百樹之葉隨雲外馳四山之禽擘霰東
邁若有所避不容稍遲心始異之及抵其境則西南北三面盡
皆雪山中波外沙儼然分界流既百折綠若再染怪石林立頽
峯歛容晷刻已移心形並澈歸途則又值仲夏上旬涼風肅肅
弦月欲落攜此枕簟坐臥岸側不復就舍館矣山寡別木惟松
之聳而上者岸乏雜草惟芝之翠而圓者塊坐無事因歷數字
內靈川秀壑笠展所至者或同茲幽奇實遜此邃潔誠西來之
異境世少之靈壤矣

新疆識畧乾隆二十九年北路大軍由波羅塔拉越塔勒奇嶺
進勦嶺險峻如關谷中林木茂密俗呼爲果子溝嶺下出泉匯